

Zeitschrift: Annalas da la Societad Retorumantscha
Herausgeber: Societad Retorumantscha
Band: 90 (1977)

Rubrik: Insais
Autor: [s.n.]

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 22.08.2025

ETH-Bibliothek Zürich, E-Periodica, <https://www.e-periodica.ch>

Insaïs

Superstiziun e realitat sociala

da Iso Camartin

Funcziuns e fuormas da «cardientschas blauas»
en la tradiziun populara

A. Introducziun

Sfegliar en texts vegls ei ina atgna experientscha. Il lectur s'engascha en ina aventura che porta anavos el en temps nunenconuscents e jasters. Mo tuttina buca jasters diltut. Pertgei sin quèi viadi anavos el temps vegn il lectur empalaus da damondas, marveglies e pissiuns schendradas dall'actualitat. Las damondas da siu temps ed ils interess da sia persuna diregian il viadi atravers il material historic. Mo leu seferma, contempla, admira ni serebalza il lectur, nua ch'in fenomen historic croda en sia mira sensibilisada. Schabegia quei buc, resta la historia ina materia morta ed il spért dil lectur seleischna sur il glatsch ora, cul qual la historia ha surtratg la realitat passada.

Buca adina reussescha ei da penetrar en la materia sferdentada. Entiras zonas dalla veta d'antruras ein sparidas ed irrecuperablas. Ils documents restonts ein magari mo pli fossils che fan resistenza endirida ad ina interpretaziun coherenta. Las largias che semuossan emprova la marveglia humana da surmuntar cun punts spirtalas da fabricat modern. Fa ella buca quei, s'avischina ella ualvess als scazis historics.

Quei ei buca mo il destin dil paleontolog, mobein era da quel che vul reconstruir senn e valeta da documents litterars d'in temps vargau. La distanza drova buca esser temporalmein immens gronda, per ch'il sentiment sefuormi ch'ins stoppi reconstruir ord atgnas forzas bia punts per saver penetrar profundamein el territori solitari

historic. Tgi che arva oz la Crestomazia per informaziuns sur da nostra litteratura orala anfla buca mo documents venerabels e prezios; eis el sincers, sche sto el conceder ch'ina gronda part dil material rimnau leu ei per in patertgar modern ualts tschelaus. Pren el denton serius la tradiziun preservada, eis ei buca fatg cun mo scurlar il tgau surlunder. El sto empruar da reconstruir il terren, el qual ils products inventarisai ein carschi e seformai. El sto esser perschuadius che mintga particla dil document hagi sia funcziun e sia logica interna, e che nuot seigi totalmein casual, era sche l'apparenza ei cuntraria. El sto surtut empruar da formular da niev las damondas, allas qualas ils documents historics paran da rispunder. El sto empruar da localisar il material cun prudentscha e precauziun en il territori da significaziun che sia voluntad da capir e declarar elaborescha.

In exempli illustrativ per la distanza seformada denter nossa tradiziun historica e nossa veta actuala ei il fenomen dalla superstiziun. Nossa litteratura orala ei emplenida grondamein cun elements da superstiziun. Era sche nies mund actual ei per lunsch buca aschi raziunals sco ins turzegia el, e sche la superstiziun ha vinavon sia dimora stabla en nossa veta moderna, ein las fuormas e funcziuns dalla superstiziun semidadas radicalmein. Quel che legia la Crestomazia cun igl interess da s'informar sur dalla superstiziun, sto emigrar en in auter temps ed en in auter patertgar. Contas cardientschas superstiziuses ein sepiarsas e svanidas, damai che la veta moderna ha sutmina profundamein talas cun arguments, fatgs e surtut experientschas. Mo da l'autra vart: tgei fascinont material sur dalla superstiziun ei documentaus en la tradiziun populara romontscha!

Naturalmein che quest artechel lubescha buca in studi detagliau dil fenomen dalla superstiziun en la litteratura orala sursilvana. Mo in pign sectur duei vegnir examinaus cheu. Igl editur dalla Crestomazia C. Decurtins ha rimnau sut il tetel «Aberglauben» 271 reglas superstiziuses. (Crestomazia tom 3, p. 625—635; tom 4, p. 1018—1019). Nuslein porscher en quest liug attenziun mo a quellas, schegie ch'ina tala selecziun dil material ei arbitrara e meins giustificada ch'il proceder che C. Decurtins suggerescha.

Superstiziun ei evidentamein buca in fenomen limitau ad ina fuorma specifica da litteratura orala. La rimnada da reglas superstiziuses che Decurtins edescha sut il tetel numnau ei primo per lunsch buca la suletta manifestaziun da superstiziun en la litteratura; secundo

ein buca tuttas reglas rimnadas sut quei tetel exclusivamein «reglas superstiziusras». Denter il material sesanflan reglas che s'audan en autras spartas che Decurtins utilisescha, numnadamein «Landwirtschaftsregeln» e «Volksmedizin». Per ina tala mischeida san ins denton buca inculpar sulettamein igl editur. Ils cunfins denter las differentas categorias ein buca fixai, mobein movibels. Denter la schinumnada «*litteratura orala en fuormas da reglas*» anflan ins elements da superstiziun silmeins en las suandontas spartas:

- Landwirtschaftsregeln (era numnadas: Bauernregeln)
- Zaubersprüche
- Volksmedizin
- «Aberglauben»

Naturalmein che autras «fuormas cuortas» sco: legns, giugs d'affons etc. ein savens era infiltradas cun superstiziun. Tuttina ha ei in cert senn da postular ina sparta cun il tetel «reglas superstiziusras», damai che las autras fuormas san vegnir caracterisadas pli specificamein entras lur scopo. Las «reglas purilas» ein destinadas da sustener il pur en sia occupaziun quotidiana cun cussegls ed admoniziuns, co el dueigi planisar ed organisar sia lavur per ch'el hagi success. Ellas serestrenschian sin la funcziun da valetar enzennas meteorologicas, astrologicas e natiralas per ingrondir aschia las letgas per profit e rendita en tuttas lavurs che s'audan tier in menaschi puril. Las reglas da «medischina populara» ein destinadas exclusivamein al scopo da prevegnir, mitigar e scatschar mals e malsognas. Ins astga dir che *l'experiertscha collectiva* ei ina part essenziala dallas reglas purilas e medicinalas. Las «reglas superstiziusras» el senn serrau dil plaid sefatschentan denton surtut cun fenomens che ein buca fundai primarmein sin l'experiertscha, mobein sin la *cardientscha collectiva*.

La differenza vegn veseivla els suandonts exempels:

Regla purila:

Cu las uolps uorlan, vegn ei macort'aura. (Crestomazia, tom 4 p. 1014)

Era sche quei ei buca ina regla cun valeta indicativa absoluta, eis ei tuttina in fatg era scientificamein nundubitabel, che midadas meteorologicas han effects sin il secumpurtar dils animals.

Regla medicinala:

Per mal il dies ei bien metter si ina pial muntaniala. (Crestomazia, tom 4, p. 987)

Era quella pratica sa esser basada sin experientscha collectiva, senza naturalmein garantir il success en mintga cass.

Perencunter: reglas superstiziusas

Per mal il dies ei bien metter si ina pial muntaniala. (Crestomazia,

Perencunter: reglas superstiziusas

a) dil tip da reglas purilas:

(151) Ei vegn detg, sch'ins semni il glin da l'ina u dallas duas, vegni el cuorts.

b) dil tip da reglas medicinalas:

(145) Per far calar mal ils dents ston ins prender in dent d'in miert denter las dudisch e l'ina ord il carner.

La differenza denter «reglas superstiziusas» e reglas purilas, resp. medicinalas ei evidenta en tals exempels. Nus sefatschentein pia en quest artechel exclusivamein cun las *reglas superstiziusas el senn serrau dil plaid* e schein d'ina vart las reglas purilas e medicinalas, era sche quellas ein fetg savens cungidas cun superstiziun. Aschia ein las suandontas remarcas restrenschedas sin fuomas extremas da superstiziun e pertuccan buca directamein il camp, nua che l'experientscha collectiva e la superstiziun sebrattan e s'interfereschan.

Ina remarca introductorya ei denton aunc necessaria appartenent la superstiziun en la *litteratura orala en fuorma da raquens*, pia praulas, detgas, legendas, novellas e.a.v. Era quella sa buca vegnir respectada cheu, essend zun spaziosa e multiforma. En in raquent s'exprima la vusch collectiva d'in pievel en moda e funcziun zun differenta da reglas e sentenzias. Era la superstiziun survegn tut in'autra funcziun il mument che ella vegn integrada el process da raquintar. Ella sa daventar leu in element integral dil raquent fictiv e piarder sia funcziun reala, exteriura alla fuorma narrativa. En las praulas ei quei il pli evident, damai che quellas construeschan sapientivamein in mund independent e separau dalla realitad. Mo era las detgas (la gronda fontauna da superstiziun transformada en in raquent) utiliseschan la superstiziun pli savens sco mied per structurar l'episoda raquintada che sco document d'ina realitad empirica. Il miraculus e sgarscheivel che fuga atras nossas detgas ei savens mo la concretisa-

ziun marvegliusa d'ina fantasia preoccupada cun s'exprimer en in raquent. Las detgas mitologicas e magicas, savens rentadas vid localitads realas ed eveniments historics, han strategias fetg raffinadas, co integrar experientscha e superstiziun en ina raquintaziun captivonta. Ei fuss pia ina lavur da tempra differenta, vulessan ins analisar las modas e manieras, co la superstiziun s'exprima e funcziunescha en las diversas fuormas che la tradizion orala ha sviluppau per in dils pli fascinonts basegns humans: il raquintar.

Pia selimitschan las suandontas pronderaziuns sin las «271 reglas superstiziuses» che la Crestomazia subsumescha directamein sut il tetel «Aberglauben». Igl intent da questa analisa ei l'emprova da reconstruir il «terren significativ» per veser e capir meglier, tgei funcziuns socialas quella dubiusa jerta ord nossa tradizion populara ademplescha ed en tgei fuormas concretas ch'ella s'exprima.

(Las reglas vegnan introducidas cun lur numera en la Crestomazia e citadas en ortografia actuala.)

B. La collecziun da cardentschas superstiziuses en la Crestomazia

Las singulas cardentschas superstiziuses rimnadas en la Crestomazia han en general la suandonta fuorma: ina regla superstiziusa consista ord duas parts ch'ins sa titular sco «part dispositiunala» e «part consecutiva». La regla exprima ina relaziun denter dus eveniments en fuorma d'interdependenza: sche ina disposiziun specifica ei realisada, suonda ord quella in eveniment specific. Per exempl:

(10) Eis ei nozzas in di da bara, vivan ils spusai buca ditg.

Quellas duas parts structureschan la relaziun che la cardentscha superstiziusa postulescha denter plirs eveniments. Aschia ei la majoriad dallas reglas vestgida era grammaticalmein en la fuorma da construcziuns subordinadas. Per exempl:

Cur che igl ei ... lu schabegia... .

Sche ins vul ... ston ins ... e.a.v.

Naturalmein dat ei biaras versiuns grammaticalas pusseivlas per exprimer ina interdependenza da dus eveniments. La fuorma grammatical sa esser pli u meins explicita. Magari eis ella reducida ad in soli member:

(194) Ins sto mai stizzar il burniu cun aua.

La fuorma detagliada per quella superstiziun fuss enzatgei sco:
(194 a) Sche ins stezza il burniu cun aua, ston las olmas endirar.

Ni forsa:

(194 b) Sche ins stezza il burniu cun aua, han ins discletg en casa.

Igl ei pia tuttavia buca necessari che omisduas parts dalla regla superstiziusa seigien formuladas (sco igl ei il cass egl exemplel 194). Era sche ina part ei buca numnada directamein, resta ella structuralmein necessaria. Senza relaziun postulada denter dus ni plirs eveniments svanescha la superstiziun facticamein. Dess ei negina consequenza ord in eveniment sco «stizzar il burniu cun aua», lu fuss quei buca scumandau alla persuna superstiziusa. Latentamein ei la secunda part dalla regla pia adina presenta.

Denter las 271 reglas en questiu dat ei enzacontas paucas, tier las qualas ins astga dubitar, schebein ei sectracta d'ina superstiziun, ual damai ch'ina dallas parts fundamentalas selai buca reconstruir directamein. Per exemplel:

(113) Il venderdis fa ei adina aura aparti.

Senza autra explicaziun expriman talas construcziuns buca ina superstiziun, mobein ina regla pli u meins vera, la quala ins sa controllar inaga per jamna ed aschia giudicar sur l'inviolabladad da talas cardientschas. Tuttina sa in coc superstiziis esser zuppaus cheu. Vulan ins eruir quel, ston ins tschercar ina fuorma expansiva per ina tala regla. Hipoteticamein savessen ins forsa dir:

(113 a) Damai che Niessegner ei morts in venderdis, fa ei quei di adina in'aura aparti.

Ni era:

(113 b) Damai che ei fa il venderdis in'aura tut aparti, duei ins buca maridar quei di.

En sia fuorma originala indichescha la regla 113 plitost ina regla meteorologica purila che ina superstiziun. Transformeschan ins ella denton cun aschuntar in motiv (113 a) ni ina consequenza (113 b), daventa la superstiziun immediat manifesta. Pia san ins transformar

mintga regla superstiziusa en ina fuorma grammatical che exprima directamein la dependenza necessaria denter dus eveniments.

Quei ei naturalmein negina casualitat, mobein il «mecanissem logic» dalla superstiziun. Aschia ha era la part disposiziunala e la part consecutiva ina impurtonza differenta per l'analisa dil material.

In exemplu muossa quei immediat:

- (233) Nua ch'igl ei baus Niessegner, dat ei buca giu il tun.,

L'emprema part circumscriva la *fuorma concreta* dalla superstiziun, la secunda sia *funcziun practica*. La fontauna dalla superstiziun egl exemplu 233 ei la «tema dil tun». Ord quella nescha il basegns da stabilir in segn da segirtad encunter il prighel. La fuorma concreta per tala segirtad daventa il bau Niessegner. L'analisa dil material sesparta pia en ina procedura dubla:

- la determinaziun da funcziuns praticas dalla superstiziun
- la determinaziun da fuormas concretas, en las qualas superstiziun semanifestescha.

1. Funcziuns dalla superstiziun

Superstiziun ei in qualitad che nescha ord giavischs, ord temas e quitaus. Analisar cardientschas superstiziudas ei perquei ina via per capir pli differenziadamein, tgei giavischs che sesviluppeschan en in pievel e tgei quitaus che squetschan quel. La funcziun dalla superstiziun ei d'approximar il cartent al giavisch e schurmegiar quel da sias atgnas temas. Nus lein dar ina egliada pli precisa sin nies material ed empruar da concretisar la realitat sociala che daventa manifesta en la superstiziun.

a) Ventira

- (168) Tgi che ha ils dents lartgs, ha cletg.
(175) Siemi'ins ch'ins detti ell'aua ni ch'ins seigi sil precint da dar en, sche han ins cletg.
(183) Faliens da combas liungas duei ins buca mazzar, quels portan cletg.
(186) Sch'ins sturnida da gigin treis gadas ina suenter l'autra, sche han ins quei di cletg.

- (229) Sch'ins anfla in crap alv, han ins ventira.

Quei ei mo entgins exempels che documenteschan il giavisch derasau da «haver cletg». Particularitads fisiognomicas, siemis, animals, casualitads fisiologicas ed incidents nunspritgai entran en survetsch dil giavisch da haver cletg e daventan aschia in bien omen. La cardientscha che ins hagi ventira sa esser in impuront impuls per activitads ed interpresas. Damai che la ventira ei buca specificada, ei in vast camp da realisaziun pusseivla libers. Mo ei dat naturalmein era exempels, nua che la fuorma da ventira vegn indicada precismein:

- (176) Tgi che siemia da plugls, survegn in schenghetg.
(190) Sch'ins anfla in fazalet, survegn ins ina brev.
(221) Ils tacs alvs sin las unglas maun indicheschan biemauns.

En tals exempels semanifestescha ina ventira casuala, buca fetg essenziala, mo che schenghegia silmeins enqual surpresa. Pli savens ei il giavisch da haver cletg denton rentaus vid fatgs essenzials dalla veta. Haver ventira vul dir concretamein: restar preservaus da malsognas e prighels, haver buna e reha raccolta, haver cletg cun ils animals, daventar spus e.a.v., pia ventira en tuts fatgs dalla veta che han impurtonza per ina communitad purila.

- (81) Cura ch'igl ei bia steilas il tscheiver, fan las gaglinas bia ovs quei onn.
(83) Sch'ils da Breil ein ils emprems a S. Marc, dat ei bia salin.
(92) Tgi che selava vigelgia S. Gion stad entochen ch'ei tucca da miezdi, resta preservaus igl entir onn da rugna.
(127) Da semnar graun duei ins metter si ina capiala lada, sche vegnan las spigias era ladas.
(232) Ins dueigi trer en in vestgiu gagl cura ch'ins metta a cuar, e metter a cuar cura ch'il cavrer va, allura dat ei bia pluscheinias sco cauras e gaglias sco il vestgiu.
(239) Rumpan ins ina guila en ina mondura, sche vegn quel che porta quella mondura spus en quella.

Bugen vegn ventira era concretisada en igl acquistar daners, scazis e cristaglias:

- (85) Sch'ins ha in rap en sac e fa in tgaubriebel cura ch'il cucu conta, sche han ins adina raps avunda.
(90) Tgi che cava S. Gion stad cristaglias, anfla in scazi.

(93) Per S. Luregn sesarvi la tiara e muossi ils scazis zuppai.

Quels exempels dueigen bastar per documentar il giavisch multifar da haver cletg. La cardientscha superstiziusa enquera dapertut segns ch'empermettan beins materials. Ins sa dir era cheu che il giavisch seigi il bab dil patratg. Il fenomen interessant sezuppa pia tuttavia buca en ils giavischs sezs, ils quals ein naturals e beincapeivels. La fantasia superstiziusa semuossa productiva surtut en il procurar per segns ed enzennas per tut quei che ins havess bugen. Tuttina ei mo ina pintga part dalla superstiziun fatschentada cun la ventira. Il fenomen cuntrari, la sventira, ei per lunsch la pli reha fontauna per la superstiziun.

b) *Sventira*

Il desideri da haver ventira resta savens aviarts enviers il cuntegn dalla ventira. Aschia sa la fantasia elaborar sin quei che savess semussar sco in fatg ventireivel. Auters ei il cass tier la tema. La sventira ch'ins tema resta mo darar nunprecisada ed aviarta. Il patratg superstiziust ha il regl da concretisar il discletg per seproteger meglier encunter el. Ils exempels ein pia pli rars, nua che la superstiziun vesa mo segns generals da sventira.

(172) Cura ch'ins survegn tacs mellens sin las unglas dils mauns, survegn ins a dies cruschs.

(177) Sch'ins siemia dad ovs, vegn ei sventiras.

(237) Beiber ord in glas rut ei buca bien.

(236) Ina crusch formada da ristials insurin munta ina sventira en casa.

Ina interpretaziun dil cuntegn dil discletg ei savens pusseivla ord l'acziun che schendra il discletg:

(105) Ins sto buca ir a mises in gliendisdis, quei porta discletg.

(110) Ir en survetsch il venderdis porta buca cletg, ni a fumegls ni a fumitgasas.

(205) Sch'ins scua stiva suenter miezdi, sche scuan ins giuadora il cletg.

En tals exempels astgan ins presupponer che il discletg sereferechi directamein sin igl «ir a mises», «ir en piazza» resp. «discletg en casa.» Cheu semuossa ei gia che era la superstiziun fundada sin tema ei localisada entuorn tut ils fatgs che han impurtonza per la veta dalla

famiglia e communitad: esser preservaus da malperinadad, malsognas, mort e da tuttas fuormas dil mal che sa taccar ins en la veta da mintga di.

- (8) Ardan las candeilas il di da nozzas sbrinzlond, sche vegnan ils consorts buca perina.
- (248) Sch'in conti dat giu da meisa e sefetga en il plantschiu, vegnan ins gleiti malperina cun enzatgi.
- (19) Cura ch'ins fa bogn ad affons ston ins better ora bufatg l'aua, schiglioc dattan ils affons bugen giu.
- (44) Maglia il lamegl ora ina ruosna el seiv, sche miera gleiti enzatgi dalla casa.
- (129) Ventscha in tier dil malner, sche duei ins metter il cor ed il lom dil tier ventschiu sin tgamin, sche peglian ils auters tiers buc; mo ins sto fimentar fetg.
- (140) Sche las cauras dattan latg mischedau, ston ins better quel en in dutg, lu cala ei.
- (181) Entaupan ins sin viadi igl emprem ina femna, sche va il viadi mal.
- (254) Ei enzatgi malsauns e san ils docters buca gidar, sche duei ins schar vegnir ora in tschadun saung, ira tier in pégn, far ina ruosna en quel e derscher il tschadun saung en quella ruosna, ch'ins staupa si; il malsaun vegn lu a vegnir sauns ed il pégn vegn a pirir vi.

Aschia vegnan tuttas pusseivlas spartas dalla veta quotidiana accumpignadas da reglas, destinadas alla protecziun encunter il mal existent ed il mal zuppau che savess tuccar ins el futur. Buc ina tema denton caschuna tonta preoccupaziun superstiziusa sco la tema dalla mort. Il spért superstizijs para nunsaziabels en quei respect:

- (39) Cura ch'il zenn va da miert, dat ei gleiti bara.
- (42) Vesan ins da notg cazzolas, miera gleiti enzatgi.
- (48) Cura ch'ils tgauns bragian, dat ei gleiti bara.
- (50) Tgi ch'entaupa la damaun igl emprem il caluster, miera gleiti.
- (62) Sch'il miert ha la bucca aviarta, miera gleiti enzatgi.

Il patratg superstizijs enquera denton buca mo dapertut segns per in fatg inevitabel sco la mort. Sper la tema che s'exprima enviers la

mort sesviluppescha era ina relaziun speciala enviers persunas mortas. Per il superstizijs ein ils morts buca morts, mobein potenzialmein adina presents e perquei ina realitat d'impurtonza. Enviers ils morts ston ins sedepurtar endretg, per lur e per igl agen rauas:

- (55) Cura ch'enzatgi miera, ston ins arver la fenestra.
- (58) Cu enzatgi miera, va l'olma tras l'aua ch'ei en casa.
- (59) Femnas che mieran en pigliola van buca a piarder e veggan bingleiti suenter per lur affon pign.
- (60) Cura ch'in affon ch'ei morts ha nodas blauas vid il culiez, eis el tuccaus dils morts ch'ein vegni per el.
- (67) Tucca ei bein ils cuors per ina persuna, sche stat ella bein; tucca ei mal, sche stat ella mal.

En la superstiziun che sefuorma entuorn la mort ed ils morts s'exprima in vegl artadi human. Igl ei in rest ord cardientschas primitivas che selai buca simplamein supprimer. Tipicamein ei la mischeida denter religiun e superstiziun en quei camp fetg intensiva. Che la veta d'in carstgaun ei buca semplamein alla fin cun la mort fisica, corrispunda ad in patertgar religius aschibein sco superstizijs. Che l'olma d'in miert mondi tras l'aua, sa daventar superstiziun mo sche ins crei en l'existenza d'ina olma. Denter il material superstizijs ein las «paupras olmas» da gronda impurtonza. Cheu s'embratscha il patertgar primitiv cun la cardientscha religiusa:

- (193) Sch'ins lai arder il fiug senza metter si enzatgei sur da fiug, sche ston las paupras olmas barschar pli fetg.
- (195) Ins sto mai mazzar ils rustgs che van per la via da Nossadunna da Trun; quei ein paupras olmas che han giu empermess il pelegrinadi en veta e buca fatg el. Suenter la mort ston ei far el en fuorma da rustg.
- (196) Ins duei buca mazzar mustgas, igl ei paupras olmas.
- (214) Cura ch'il clavau tgula, bragian las olmas.
- (250) Sch'ins betta sal enta fiug, fan ins ina ovra per las olmas.
- (264) Las siarps cun cresta ein olmas che pertgiran scazis.

Las reglas superstiziujas appartenent il sedepurtar dils morts ein savens nuot auter ch'ina concretisaziun materiala dil patertgar religius. La veta spirtala, greva d'imaginar concretamein, sto anflar ina expressiun reala. La religiun ei ual en in patertgar primitiv

suttaposta a quella specia da realisaziun concreta ch'ella sto cumbatter sco heresia e superstiziun.

Ils morts e lur agir ein denton per bia buca il sulet revier, nua che religiun e superstiziun vegnan en contact. Igl ei segiramein ina fuorma legitima d'expressiun religiusa da veser il mal en maniera persunifica-da. Quel da cornas cun sia rateina, nauschasperts e surmenaders, ein tuttavia buca mo da casa el mund superstiziuz. Tuttina s'avonza la superstiziun en la persunificaziun dil mal pli lunsch che la cardient-scha religiusa. Carstgauns en possess da forzas infernalas cumparan bein era en la bibla, mo la superstiziun ha bia meins retenentschas da tractar ina persuna dubiusa sco in esser en possess dil mal. La fascinaziun per strias — carstgauns che stattan en contact cun forzas demonicas e caschunan aschia disgrazias e malura — ei era in vegl relict «cultural». Il patertgar primitiv ha il basegns da veser tut il mal che schabegia sco malaveglia d'ina persuna schliata:

- (36) Affons pigns dueigien buca ir naven d'igl esch-casa suenter tuccar d'avemaria, schiglioc pon schliata glieud noscher els.
- (173) Cun tuccar maun ad in carstgaun sa ina stria far vegnir quel malsauns.
- (174) Streha ina stria ad in tier sur il dies ora, sche peggia quel il malner.
- (108) Ina femna che trai panaglia ina mesjamna, ei ina stria.
- (191) Ins sto better ils cavels-glieud en il fiug, che las strias possien buca tier els.
- (245) Sch'il buob che rispunda messa mira anavos duront igl oratefratres, sche vesa el tuttas las strias da quella vischerna cun in strom en bucca.

La schlatta feminina ei insumma suttaposta levamein ad incriminaziuns el patertgar superstiziuz:

- (182) Catta ina buoba biemaun igl emprem, sche han ins discletg. In buob porta cletg.
- (269) Ins dueigi mai schar strihar femnas veglias in tier sur il dies ora.

Ord tala tema, ch'il mund seigi populaus da carstgauns maligns e malvugli, crescha il basegns per cunteracziuns:

- (130) Per tuccar la stria che ha fatg il malner, munglass ins barschar il tier vivs.

- (244) Per puder tuccar tiers striunai, ston ins metter paun en la buis.
- (271) In tier ch'ei sin seventscher perquei che schliata glieud han pudiu tier el, duei ins satrar sut la grunda, metter giuaden el vibs cun cadeina e zampugn; il nas ed ils peis, ch'ins ligia ensemes, sto ins schar vargar siado. Tgi che ha nuschiu, sto lu pirir.

Ins sa che la cardientscha en strias ha caschunau el decuors dalla historia mort e tortura a biars carstgauns innocents. Auters ein stai exponi per lur veta al sprèz dalla cumionza, en la quala els stuevan viver. Las strias ein perquei in dils trests capetels en la historia dalla superstiziun. L'incriminaziun da persunas che ins tegn per prigulusas sin fundament da lur acziuns ni lur pareta, ei era in segn che distingua claramein superstiziun da religiun. Ei semuossa cheu denton forsa il pli evidentamein che superstiziun ei buca mo ina cardientscha privata che fa donn a negin. En sias fuomas extremas daventa ella in mied destructiv che vul buca mo declarar il mal, mobein che caschuna era quel.

c) *Educaziun e morala*

La superstiziun ha ina relaziun ambivalenta enviers il problem co evitar il schliet e caschunar il bien. Certas reglas ein destinadas ad exponer il cartent ad ina tenuta passiva: ellas sefatschentan cun enzennas d'ina ventira u d'ina sventira nunevitablas.

- (70) Dat il zenn grond suenter ch'ins ha satrau ina bara il davos tuc, sch'ei l'emprema bara in um. Dat il zenn massaun il davos tuc, sche miera ei sissu ina femna.

Quei ei ina enzenna fatalistica senza intervenziun humana pusseivla. Imaginassen ins in caluster che regulass cun tecnica il tuccar da miert, svaness immediat la superstiziun cun igl element impuront dalla casualitat. — Autras reglas denton engaschan activamein il cartent en acziuns co sepertgirar dil mal e planisar il cletg. Aschia sto il carstgaun superstiziis accumplir tuttas sorts da rituals per restar nuntuccaus da disgrazias:

- (143) Per buca schar vegnir il derschalet, ston ins metter ils caltscheuls en crusch sin il plantschiu avon il letg.

Quella differenza formala denter las reglas da superstiziun ei impurontata. L'activitat superstiziusa, l'emprova directa d'intervegnir

el decuors dil destin, ha savens denton ina funcziun puramein pratica. Ins zuglia reglas educativas en ina superstiziun, probabel per intensivar la tema en cass d'ina violaziun dalla regla. Aschia dat ei era numerosas reglas che ein buca destinadas alla protecziun encunter sventira ni alla retscherca da ventira, mobein al scopo da fortificar l'educaziun. En quei connex dat ei reglas significantamein numerosas che sedrezzan ad affons:

- (30) Affons che maglian scheuldas, survegnan plugls.
- (31) Sch'ils affons maglian paun misch, vegnan els buns candardurs.
- (34) Ils affons che beiban latg caura da pign astgan ir da grond sco las cauras el malsegir.
- (35) Tgi che beiba bia latg caura da pign, vegn nauschs sco las cauras.
- (37) Ins sto buca schar mirar in affon da cazzola el spieghel schiglioc vesa el leu il giavel.

Savens ein las reglas era mo dictadas da cunvenziuns, sco els cass suandonts:

- (78) Quei che vegn filau gievgiagrassa maglian las miurs.
- (80) Glin e launa che vegnan filai gliendisdis e mardis tscheiver maglian las miurs.

(Ins fa pia buca lavurs seriusas dis da barlot)

Ni era:

- (207) Sch'ins catscha il cunti el latg, tagl'ins egl iver dalla vacca.

Quei po esser ina regla fetg impressiunonta per ils affons che sedeporan davos meisa buca tenor giavisch. Interessanta ei era cheu la relaziun denter religiun e superstiziun. Argumentaziun religiosa ei in ferm regulativ per in sedepurtar civilisau:

- (202) Quel che snizregia il paun, vegn buca en parvis.
- (204) Cura ch'ins metta cuntials cun il tagliom ensi e cul dies engiu, sche fora quei il cor a Nossadunna.
- (206) Sch'ins fa pésch en l'aua sche bragia Nossadunna.
- (222) Buca metter sutsu il paun sin meisa, schiglioc bragia Niessegner.
- (223) Buca tagliar il paun senza basegns, schiglioc bragia Niessegner.

- (77) Sch'ins pren buca aua benedida Nadalnotg avon che ir a letg, sche vegn il giavel e va cun ins sin in pal si e da tgamin ora.
- (29) Ins duei buca schar ira anavos ils affons, schiglioc portan els aua al giavel.

Ina funcziun repressiva ni forsa era mo educativa per carstgauns carschi ha la suandonta regla:

- (11) Femnas maridadas che portan buca ani ston purtar in ani da fiug el purgatieri.

Aschia vegn la veta quotidiana era reglamentada da superstiziuns che caschunan segiramein negin donn, ein denton mieds cunvegnents per fortificar l'educaziun ed il cumpurtament moral. Era talas reglas ston ins veser ord la funcziun che ellas han en in mund social determinau e circumscrit. Igl ei pia buca cunvegnent da sedumandar, schebein las reglas educativas seigien bunas ni buc. Ellas ein en mintga cass appropriadas al tip da veta che ellas rinforzan.

Cun quels exempels lein nus concluder las remarcas sur las funcziuns differentas dalla superstiziun, senza vuler pretender che quellas seigien elaboradas cheu completamein. Ins vesa denton segiramein gia da cheu anora a cons basegns che la superstiziun renda survetschs. Magari che ils basegns semidan pli spert che la superstiziun. Enzatgei che fageva a sias uras tema, po esser circumdau d'ina acziun superstiziusa aunc ditg suenter che la tema reala ei svanida. En biaras reglas superstiziudas surviva aschia savens in sedepurtar curios che ins sa declarar mo malamein, ual damai che il motiv per quel ei buca reconstruibels pli. En auters cass svanescha ina superstiziun ensemen cun il motiv che caschuna quella.

2. Fuormas dalla superstiziun

Analisond la «part disposiziunala» d'ina regla superstiziusa fan ins enconuschientscha cun las fuormas concretas, en las qualas il patratg superstiziuss s'ignivescha. Buca meins impurtonta ei denton ina autra informaziun che ins sa gudignar examinond las fuormas concretas dalla superstiziun, numnadamein co il patratg superstiziuss operescha. Consequentamein san ins sparter l'analisa dallas fuormas en ils dus aspects: co ellas s'objectiveschan e co ellas opereschon.

a) Fuormas d'objectivaziun

La superstiziun viva dalla cardientscha che certi eveniments, che schabegian en la natira ed en la societad humana, hagien ina muntada buca mo per sesezs, mobein surtut era per enzatgei auter, buca directamein veseivel. Il mund real vegn aschia enrihius cun significaziun. Tipicamein dat ei eveniments privilegiai per daventar segns ed enzennas da significaziun speciala. Nus lein articular cheu mo ils pli frequents:

Per il carstgaun superstizius consista igl onn buca ord unitads matematicas che spartan quel en meins, jamnas, dis, uras e.a.v. Ils ciclus naturals digl onn, dil meins e da di e notg influeneschan il carstgaun grondamein e determineschan sia veta e sias lavurs. Partend da quella interdependenza naturala emprova il carstgaun superstizius da temporalisar e localisar sias acziuns el cerchel dil temps. Aschia survegnan *dis e temps specials* ina significaziun speciala, e vegnan cumbinai cun certas lavurs ed acziuns ch'ins sto accomplishir tenor termin.

- (89) Sch'ins scavogna ils baguos da vigelgia S. Gion avon tuccar da miezdi, sche vegn ei buca si giattas e dat grondas tiastas.
- (94) Sch'ins cava sin S. Luregn entuorn las dudisch la tiara, anfl'ins cotgla e quella ei buna per preservar ils tiers dil malner.
- (103) Ins sto buentar ils vadials l'emprema gada Venderdis Sogn, allura stattan els sauns.
- (112) Vigelgias duessen ins buca ir els uauls, ins sesventirescha tgunsch.
- (251) Sch'ins metta per Nadalnotg ina canastra fein ch'ins ha pinau per dar en l'autra damaun ed ina sadiala sal ora el liber en tutt'aura, sche peglian ils tiers buca il malner.

Sco ins sa, ei ina gronda part dallas reglas purilas structuradas entrais il cussegl d'ademplir ina lavur sin in cert termin digl onn. La superstiziun denton slargia bugen la relaziun evidenta denter lavur purila e ciclus temporal e semova aschia en regiuns pli gagliardas:

- (12) In che nescha sin quaterempras empren bia pli tgunsch en scola, e pli tard vesa el spérts, strias e barlots.
- (14) Affons che neschan sin ina vigelgia dattan glieud aparti che han visiuns e san dir ordavon cu enzatgi miera.

- (54) Il pli tgunsch miera ins duront igl ir giu dil sulegl, il pli vess da mesanotg.
- (109) Taglian ins giu las unglas in venderdis, ston las olmas magliar ellas.
- (261) La megliera enzenna da cular pieun ei il capricorn da digren. Surtut buca cular pieun da carschen, pertgei lu resca ins da schar ir tut en la fueina.

Superstiziun semuossa aschia sco transgressiun e transposiziun d'in interess raziunal — numnadamein d'anflar la buna correspondenza denter temps e lavur — en ina cardientscha stravagada e ridicula en la muntada da temps specials per la veta dil carstgaun. Cheu sepresenta denton era la lingia malsegira denter regla purila e superstiziun. Tgi less decider claramein els suandonts exempels, nua che la funcziun pratica legitima sespiarda en spira superstiziun?

- (87) La vigelgia S. Gion duei ins ligiar si igl agl, schiglioc sfundra el.
- (153) Segان ins l'enzenna dil scorpion, maglian ils tiers buca il fein.

Sper temps e dis specials survegnan era *fenomens meteorologics* savens significaziun superstiziusa (plievgia, neiv, sulegl, artg en tschiel, garniala e.a.v.).

- (4) Clar di da nozzas, lartg en casa.
- (5) Eis ei malaura il di da nozzas, sedattan e sepugnan ils maridai.
- (6) Sch'ei neiva e cufla il di da nozzas, sche vegnan ei aschi paupers ch'ei ston ira cun il sitget.
- (160) Ha igl artg bia verd, sche dat ei bia fein; bia tgietschen, sche dat ei bia vin; bia mellen, sche dat ei bia graun.
- (161) Cur ch'igl ei bia neblas cotschnas vid il tschiel, dat ei bia uiara.

Purtaders da significaziun speciala ein surtut era *animals*:

- (46) Fan las schualmas in onn igniv en ina casa e tuornan l'auter onn buca pli, sche miera enzatgi en quella casa.
- (52) Il catschadur che vesa in camutsch alv sto murir.
- (189) Dat ei daried faliants da combas liungas, sche dat ei bia pieun.
- (209) Tgi che mudregia utschals dalla cua cotschna, piarda la pli biala vacca.

(264) Las siarps cun cresta ein olmas che pertgiran scazis.

Buca meins significativas ein *parts dil tgierp human*:

- (1) Van las cusadiras sin la palmamaun lunsch ina ord l'autra, sch'ei quei ina enzenna ch'ins maridi; van ellas plitost ensemes, sche maridan ins buc.
- (162) Quels da cavels mellens ein ventireivels.
- (168) Tgi che ha dents lartgs, ha cletg.
- (220) Han ins il nas che morda, survegn ins dagrettas.

Igl ei capeivel che tuttas *persunas suttaostas a rituals* ein specialmein attractivas per sviluppar significaziun superstiziusa. Aschia ein prers e calusters, mo surtut persunas ual mortas objects favori:

- (57) Mieran plevons u calusters, sche mieran gleiti plirs suenter.
- (68) Cava il caluster ina fossa il gliendisdis, sche dat ei puspei bara avon che l'jamna seigi ora.
- (69) Mettan ils umens che satiaran vi gl'emprem il zapun, sche miera in um suenter; mettan els aber vi gl'emprem il badel, ei l'emprema bara ina femna.
- (201) Sch'ils ners van a capetel, vegn ei a plover.
- (255) Tgi ch'entupa la damaun da Daniev gl'emprem il caluster, quel miera quei onn.
- (62) Sch'il miert ha la bucca aviarta, miera gleiti enzatgi.
- (63) Sch'il tgierp dil spartiu resta ualti ditg caulds, sche va ei prest enzatgi auter.
- (66) Aschigleiti che quels che portan la bara ein en santeri, vegn quella pli greva.

Era *acziuns ritualas* ein ina materia qualificada per superstiziun. Savens nescha la superstiziun cheu directamein ord il ritus religius:

- (8) Ardan las candelas il di da nozzas sbrenzlond, sche vegnan ils consorts buca perina.
- (9) Semeinan il spus e la spusa sin igl altar cun il dies in encunter l'auter, sche vegnan els gleiti malperina.
- (20) Cura ch'ils affons bragian tochen ch'ei battegian, mieran els gleiti.
- (38) Cura ch'ei dat las uras duront alzar si Niessegner, miera gleiti enzatgi.

(77) Sch'ins pren buca aua benedida Nadalnotg avon ch'ir a letg, sche vegn il giavel e va cun ins sin in pal si e da tgamin ora.

(227) Tgi che vegn malsauns en baselgia, vegn buca tgunsch sauns.

Mo era autras acziuns ritualas, buca directamein en connex cun il mund sacral, mo savens da *muntada simbolica*, ein purtadras da significaziun superstiziusa. Aschia per exempl: nescher, far tgina cun igl affon, murir, baghegiar casa nova, semnar, metter a cuar ovs, barschar enzatgei e.a.v. Per quei vast camp da pusseivladads mo ils suandonts exempels:

(15) Affons che neschan cun ina capetscha vegnan paders ni mungias.

(23) Cura ch'ins fa nana ad ina nana vita, fan ins nana al giavel.

(59) Femnas che mieran en pigliola van buca a piarder e vegnan bengleiti suenter per lur affon pign.

(224) Mettan ins fundament tier ina casa nova, eis ei era cavau fossa per in member da famiglia.

(128) Da semnar glin duei il semnader star fetg sidretg, sche vegn il glin liungs e grads.

(259) Sch'ins vul metter sut ovs, sche duei ins volver giu ils caltscheuls ed encavigliar ils ovs tochen ch'il cavrer corna. Gl'emprem per che las pluscheinas survegnien combas satellas ed il secund per ch'ils pluscheins vegnien ora tuts.

En tuttas tradiziuns popularas ein ils *siemis* suttaposts ad interpretaziuns superstiziudas. Aschia ha era la tradiziun romontscha ses exempels:

(149) Cura ch'ins siemia da siarps, han ins gleiti suenter scandal.

(178) Siemian ins da paun criu u da carn frestga, sche miera gleiti enzatgi.

(179) Siemian ins, ch'in(s?) hagi piars ils dents, sche miera enzatgi dalla parentella.

Fetg savens ein *objects cun muntada simbolica* la fuorma, vid la quala la superstiziun seferma. Cheu seigien mo entgins objects frequents numnai, senza presentar ina numeraziun cumpletta. (Mo in exempl vegn indicaus suenter mintga object cun sia numera:)

Aua (140), fiug (193), saung (131), latg (236), sal (250), paun (212), ossa (241), carn (130), crappa (229), fretgs (197), jarvas (188),

vestgadira (159), cuntials (207), fier (146), glas (237), cazzolas (42), ramurs (47), candeilas (8), zenns (39), steilas (62), cruschs (268), cefras (74) e.a.v. La pusseivladad d'aschuntar ina muntada simbolica ei dada tier scadin object menziunau. La cardientscha superstiziusa s'objectivescha aschia en ina «largia da significaziun» particolar a tals objects ed emplenescha quella cun sia significaziun speciala, determinada dals motivs discussiunai el capetel precedent.

Cun quels exempels bandunein nus las fuormas d'objectivaziun. Igl entir material en questiun selai subsumar sut las categorias proponidas cheu. Naturalmein che quellas seschassen differenziar aunc vinavon en detagls. Mo ils pli frequents ed impurtonts objects, en ils quals la superstiziun s'incarnescha, sesanflan senza dubi el ravugl dallas fuormas d'objectivaziun presentadas.

b) *Fuormas operativas*

Ei fuss segiramein falliu da pretender che il patertgar superstiziis seigi fundamentalmein alogics ni era mo prelogics. Buca il manco da logica ei surprendents en la superstiziun, mobein las selecziuns e restricziuns logicas che il patertgar superstiziis demuossa. Ins sto pia plidar d'ina *logica segmentara* che funcziunescha tenor reglas particulares, las qualas nuslein ussa cuortamein dilucidar. Sco criteri general per la superstiziun savessen ins forsa dir che la relaziun denter plirs elements vegni caracterisada essenzialmein entras bloccadas da transgressiun. Exempels sclareschan immediat, en tgei senn che quei ei manegiau:

(55) Cura ch'enzatgi miera, ston ins arver la fenestra.

Ina tala acziun ei logica sut ina cundiziun, la quala astga buca vegrir supprimida: la cardientscha en l'olma sco fenomen material che banduna il tgierp human suenter la spartida e sto anflar ina via per saver s'allontanar. Vegness la fenestra buca aviarta, stuess l'olma dil miert star vinavon en casa, anflass buca il raus e laschass buca quel als cussadents.

(58) Cu enzatgi miera, va l'olma tras l'aua ch'ei en casa.

(64) Cu enzatgi ei miert, ston ins better ora tut l'aua ch'ei en casa.

La regla 64 ei, sco ins vesa, mo ina consequenza tratga ord la cardientscha exprimida en regla 58. Cheu semuossa ei pia, co la cardientscha (en l'olma) generescha ina logica segmentara che ei conse-

quenta, senza denton esser habla da surmontar la bloccada, dada entras la cardientscha en la materialisaziun dall'olma. La logica che generescha ord cardientschas superstiziusas sa naturalmein haver differentas fuomas. En igl exempl

- (207) Sch'ins catscha il cunti el latg, sche tagl'ins egl iver dalla vacca.

vegn la relazjun logica denter il liug da producziun ed il product formulada. Autras reglas san esser structuradas tenor il principi *d'associazion*:

- (249) Ins astga mai barschar lenn-suitg, pertgei Sontga Mierta ei vegnida barschada cun lenn-suitg.

Savens ston ins era reconstruir mentalmein il tip da logica, damai che la regla sezza formulescha buca quel:

- (237) Beiber ord in glas rut ei buca bien.

Il glas rut daventa ina manifestaziun per enzatgei auter che savess rumper. Il ligiom logic schai pia en ina qualitad digl object che vegn transferida sin in'autra situaziun.

La pli frequenta operaziun logica en las reglas superstiziusas ei il *patertgar tenor analogia*. Denter nies material dat ei tozzels exempels che funcziuneschan aschia:

- (13) Cura ch'ina dunna anfla duas spigias sin in strom, survegn ella schumellins. (duas spigias: dus affons)
- (14) Affons che neschan sin ina vigelgia dattan glieud aparti che han visiuns e san dir ordavon, cu enzatgi miera. (ir ordavon: dir ordavon)
- (15) Affons che neschan cun ina capetscha, veggan paders ni mungias. (capetscha da naschientscha: capetscha da profes-siun)
- (16) Ins dueigi buca far bogn als affons en in vischi che piarda, schiglioc pon els silsuenter buca tener l'aua. (vischi che piarda: scufla che piarda)
- (61) Cura ch'ins vesa a dar giu ina steila, sche miera enzatgi en quei mument. (curdar: murir)
- (219) Quella che fa il tschoss bletsch da lavar, survegn in bueder. (tschoss bletsch: «um bletsch»)
- (260) Per far ina vadiala steila frev'ins massa neiv en la fontauna duront che la vacca bueva ual suenter haver dau bov. (colur dalla neiv: colur dalla vadiala)

Savens ei l'operaziun logica d'analogia cumbinada cun in secund principi: quel da *contagiun*. Vegrir en contact cun certi objects ei cumbinau cun il prighel da surprender sias qualitads:

- (10) Eis ei nozzas in di da bara, vivan ils spusai buca ditg.
(contagiun dalla mort)
- (17) Tgi che vul affons da fina colur, sto metter vin e latg el bogn.
(contagiun dalla colur)
- (134) Sch'ins lai dumbrar las briclas in auter, survegn quel sez ellas.
- (138) Per far calar las briclas, ston ins metter tons crappets sco ins ha briclas sin in crap pli grond. Tgi che fa lu dar giu ils craps, survegn lu sez las briclas.

Las duas davosas reglas laian percorscher exactamein, nua ch'il bloc mental superstiziis schai. Insumma ei il fenomen da *contagiun* positiva ni negativa in factur ordvart productiv per generar superstiziun. Quei muossan era las suandontas reglas:

- (144) Tgi che vul far calar il guotter, sto strihar quel cul maun d'in affon miert.
- (173) Cun tuccar maun ad in carstgaun sa ina stria far vegnir quel malsauns.
- (174) Streha ina stria ad in tier sur il dies ora, sche peglia quel il malner.

Autras fuormas frequentas da logica segmentara enteifer la superstiziun ein:

logica da *coincidenza*:

- (38) Cura ch'ei dat las uras duront alzar si Niessegner, miera gleiti enzatgi.
- (135) Las briclas calan sch'ins fruscha ellas duront ch'ei tucca da bara.

logica d'*opposiziun e contrast*:

- (1) Van las cusadiras sin la palmamaun lunsch ina ord l'autra, sch'ei quei ina enzenna ch'ins maridi; van ellas plitost ensemble, sche marid'ins buc. (dapart-maridar: ensemble-buca maridar)

(132) Tgi che tschontscha el sien, dueigi prender in ies ord il carner e metter quel sut il plumatsch, allura cala el da tschintschar.
(plidar dil semiader: silenzi dil miert)

(Sco ins vesa funcziunescha quella regla era tenor la logica da contagion; la regla sto pia buca funcziunar exclusivamein mo tenor in principi.)

(226) Tgi che baghegia casa nova sto murir. (veta nova: mort)

Ual aschi bein sco l'opposiziun ed il contrast sa denton era la *parallelidad* vegnir duvrada sco associazion:

(67) Tucca ei bein ils cuors per ina persuna sche stat ella bein; tucca ei mal, sche stat ella mal.

(Ei seigi mo menziunau en parantesa, che la logica tenor analogia tractada suren ei era ina fuorma da parallelidad.)

In dils fascinonts fenomens per fuomas da logica segmentara ei quei che ins savess numnar la logica da *representanza*, ni era la logica dil *fetisch*. Cheu s'avischina la superstiziun a fuomas dil patertgar patologic aschibein sco a fuomas dil lungatg poetic. Biaras reglas superstiziusas savessen ins descriver sco realisaziun da retorica poetica. (Ils specialists da litteratura vegnan gia ad haver engartau realisaziuns metaforicas, metonimicas, sinecdocalas e.a.v.) Da l'autra vart vegn cheu era la vischinanza cun fuomas da patertgar da pievels nuncivilisai (e cheutras cun fenomens dalla psicopatologia moderna) veseivla. Igl artadi arcaic, che ei semussaus el cuntegn da numerosas reglas superstiziusas, serevelescha cheu en sias fuomas operativas. Per fenomens da representaziun, fetischissem, realisaziun «pars pro toto» e.a.v. seigien aunc ils suandonts exempels citai:

(129) Ventscha il tier dil malner, sche duei ins metter il cor ed il lom dil tier ventschiu sin tgamin, sche peglian ils auters tiers buc; mo ins sto fimentar fetg.

(130) Per tuccar la stria che ha fatg il malner, munglass ins barschar il tier vivs.

(136) Sch'ins metta in toc carn criua sut il stelischaun, calan las briclas.

(157) Sch'ins vul ch'ils pors stettien duront la stad en l'alp, sche ston ins trer ora ad els treis zeiclas gl'emprem di ch'els ein en l'alp e tschentar quellas en il mugrin dalla tegia.

(247) Sch'in catschadur vul gartegiar las uolps, sto el metter treis miulas paun en la puorla.

(254) Ei enzatgi malsauns e san ils docters buca gidar, sche duei ins schar vegnir ora in tschadun saung, ir tier in pégn, far ina ruosna en quel e derscher il tschadun saung en quella ruosna, ch'ins staupa si. Il malsaun vegn lura a vegnir sauns ed il pégn vegn a pirir vi.

Ins savess differenziar era las fuomas operativas aunc pli detagliadamein. Ual ils davos exempels per la logica da representaziun e fetisch ein in material custeivel per analisar, co il patratg superstizijs operescha. Igl intent ei cheu denton buca ina analisa sistematica dil material, mobein l'emprova da caracterisar cuortamein silmeins las fuomas principalas dalla logica interna che structureschan las reglas superstizijsas.

C. Conclusiun

L'emprova da cavigliar las reglas superstizijsas en caums separats tenor ils criteris, schebein ellas articuleschan

- a) in segn per enzatgei che schabegia fatalisticamein el present ni el futur
- b) ina admoniziun co reagar e secumpurtar enviers segns fatalistics
- c) ina experientscha fundada en ina cardientscha collectiva buca falsificabla empiricamein

meina buca a resultats univocs. Las reglas superstizijsas retilan ord differentas fontaunas las forzas, cun las qualas ellas occupeschil spért human. Ina singula regla po haver pli che mo ina funcziun e s'exprimer en pli che mo ina solia fuorma. Superstiziun ei in fenomen vast, cumplicau e multiform, che entra en relaziuns pli u meins legitimas cun l'experientscha vivida, cun la religiun, cun la tradiziun e cun il quitaui per il futur. Davos las singulas reglas superstizijsas cumpara la situaziun sociala d'in pievel aschispert che ins pren en mira lur diversas funcziuns. Las fuomas concretas da l'autra vart ein indezis significativs per la moda e maniera, co il patratg superstizijs proceda e nua ch'el renta il fil per sia logica fragmentara. Nus lein arrundar quels patratgs sur dalla superstiziun cun duas remarcas

- a) sur la superstiziun sco fenomen historic,
- b) sur il problem da reconstruir la «realidad sociala historica» ord documents dalla tradiziun orala.

a) Il sguard en la historia revelescha, che la superstiziun ei buca mo in fenomen fetg vegl, mobein era ordvart persistent. Ella endrida ina cumparegliaziun cun substanzas biologicas che caschunan certas malsognas. Ins sa cumbatter talas cun medicaments eligi, cul temps daventan las substanzas denton resistentas, midan lur cumpurtament ed attaccan puspei cun novas forzas il tgierp human. Aschia para era la superstiziun d'esser in potenzial antropologic adina present, era sche sias fuormas exteriusas semidan. Igl ei buca ual lev da decider, tgei «grad d'infecziun» che la cardientscha en horoscops, tagliors sgulonts, amulets ed appariziuns spiritisticas representa. Las forzas raziunalas ein mo ina part limitada dil desideri human da dar significaziun concreta e substanziala alla realitad. Ins savess buna mein descriver il fenomen dalla superstiziun cun il proverbi franzos: pli zun ch'ei semida e pli ch'ei resta il medem. La logica raziunala e dialectica ha mai finiu il cumbat encunter la pli cumadeivla e meins consequenta logica segmentara, en la quala la superstiziun vestgescha cardientschas buca questiunablas.

Mo quei vul buca dir ch'ins dueigi surveser las differenzas enormas denter ils differents stadiis historicis, els quals la superstiziun semanifestiescha. La pelletscha alva-suitg, ch'ins duei metter si per il libereti, piarda sia attracziun il mument che quella malsogna daventa curabla pli spert e pli effectivamein cun medicaments dalla medischina scientifica. Las enconuschentschas dalla agricultura moderna spargnan al pur la tema, ch'ei detti mo rabetscha, sche el metti truffels «ell'enzenna dalla feglia». La forza electrica che remplazza la candela che vul trasora stizzar ei meins disponida per daventar in segn per in mortori proxim. Aschia remplazza scienzia e progress pass per pass ignoranza e cardientscha superstiziusa. Mo era nies stil da viver, corrispondents al scalem civilisatoric, demodescha ed eliminiescha fuormas concretas da superstiziun: probabel havein nus aunc buca piars totalmein la tema avon il murir, mo quei fenomen ei oz bia pli allontanaus da nossa experientscha quotidiana, aschia che el occupiescha bia meins nies spért. Aschiditg che in carstgaun restava el ravugl da sia famiglia era duront malsogna e mort, era la preoccupaziun quotidiana cun la mort garantida. Il carstgaun encureva segns ed enzennas en tuts pusseivels camps per sefamiliarisar cun la tema dalla mort. Nossas temas ein setransformadas e cun ellas la pli vasta oasa dalla superstiziun. Mo era oz resta ual la tema aunc ina fritgeivla

fontauna per superstiziun moderna. Quei ch'in pievel crei, includa aunc adina las meglieas informaziuns sur da ses giavischs e da sias temas.

b) Ina entira trocla da problems per la reconstrucziun dalla realitat sociala ei dada entras il status special dalla litteratura orala. Per entscheiver: Con representativs ei il material rimnau? Ina damonda hanada ual el cass dalla Crestomazia, nua che metodas e praticas dil rimnader aschibein sco l'identificaziun dallas fontaunas san tuttavia buca veginr contempladas sco superiuras a dubis ed objecziuns. Igl interpret sto aschia respectar las largias dadas ed astga buca trer conclusiuns che survargan la peisa documentara dil material. El astga buca generalisar las informaziuns sco exemplaricas per ina entira gruppera sociala, astga denton aunc meins veser quel sco formulaziun individuala. Risguardond quella limita sto el s'avischinar als avantagegs dalla «idea crestomaticala», numnadamein da collecziunar «il meglie» enteifer ina tradiziun. Il *sociolog* integrass bugen las informaziuns gudignadas ord il fenomen da superstiziun en auters documents ord la veta reala e cumponess aschia toc per toc il diagram social dalla gruppera en questiu. El savess bugen, co la structura da famiglia, las rollas socialas, ils problems da lavur etc. reflecteschan sias perschuasiuns gudignadas ord l'analisa dil material da superstiziun. Ei semuossa cheu pia, sin tgei scalem reduciu che la retscherca dalla realitat sociala ord las reglas superstiziusas sto secuntentar. Buca megliera ei la posizion dil *filolog litterar*. El enconuscha il stan dalla discussiun contemporana sur dallas differenzas fundamentalas denter litteratura orala e litteratura screta. El sa che il caracter extrapersunal e collectiv dalla litteratura orala drova outras tecnicas d'analisa interpretativa, difficilas d'applicar e per el process da veginr sviluppadas ed experimentadas. Las posiziuns litteraras d'autur, lectur ed interpret s'expriman differentamein el mument che la «censura preventiva» dalla communitad intervegn e surveglia il messadi litterar. Ina damonda essenziala ei aschia per el la significaziun dils texts, formada entras la «fuorma utilitara» (*Gebrauchsform*) ed entras lur «integrazion en la veta» (*«Sitz im Leben»*), era quei informaziuns che san buca veginr extrapoladas sulettamein dil material rimnau. — In impurtont plaid en la questiu ha plinavon igl *etnolog* che valetescha il material entras studis comparativs, zeivra

quel tenor criteris locals, temporals e tematics, decida tgei che ei veramein «original» el senn d'excepziun e tgei che fa part d'in corpus general da cardientschas popularas e superstiziuns, tipics per singulas culturas e tradiziuns. — E finalmein astgass ins buca emblidar il *psicolog* che fuss segir buca cuntents cun reducir ils motivs per la superstiziun sin giavischs e temas, mobein elaborass in vast plan d'activitads humanas che interfereschan cun il cumpurtament superstiziuss. (Per exemplu la relaziun denter creativitat imaginativa e superstiziun, in fatg che nus havein buca explorau en nies connex, schegie che el ei immens impurtonts per ina analisa integrala dalla superstiziun.)

Quellas remarcas ein segiramein sufficientas per indicar la direcziun d'ina analisa pli profunda e specificada dil material sur dalla superstiziun che sesanfla en la Crestomazia. In sforz interdisciplinar da vasta dimensiun fuss necessaris per explotar quei immens artadi en tut sias fuormas e funcziuns. Il scopo da quest artechel ei cumplenius, sch'il lectur ha saviu seperschuader che era ils pli curios documents da nossa tradiziun cuntegnan in messadi informativ sur enzatgei forsa emblidau, survargau e rufidau, mo che viva en novas fuormas vinavon cun nus.

Giesta da litteratura consultada

(en sequenza alfabetica)

Albergamo F., Fenomenologia della superstizione, Roma 1967.

Bächtold-Stäubli H., (Hrg.) Handwörterbuch des deutschen Aberglaubens, Berlin 1927 ff.

Bausinger H., (Hrg.) Zauberei und Frömmigkeit, Volksleben Bd. 13, Tübingen 1966

Bausinger H., Formen der Volkspoesie, Berlin 1968

Greimas A.J., La littérature ethnique; Sémiotique et sciences sociales, Paris 1976

Hauser A., Bauernregeln, Zürich 1973

Jakobson R.-Bogatyrev P., Le folklore, forme spécifique de création; (Jakobson), Questions de poétique, Paris 1973

Küpper H., Unberufen, toi, toi, toi, Frankfurt 1971

- Leithäuser J.G., Das neue Buch vom Aberglauben, Berlin 1964
Mühlmann W.E., Artikel: «Aberglaube», «Magie», «Primitivität» in Wörterbuch der Soziologie, hrg. v. Bernsdorf W., Stuttgart 1969
Röhrich L., «Aberglaube», in: Religion in Geschichte und Gegenwart, Bd. 1, Tübingen 1957

Zusammenfassung:

Die Rätoromanische Chrestomatie (Band 3, S. 625—635; Band 4, S. 1018—1019) enthält 271 «Regeln des Aberglaubens», die der Herausgeber C. Decurtins gesammelt hat. Die Bedeutung des Aberglaubens in diesem Material wird hier — in Abgrenzung von Bauernregel, Volksmedizin und insbesondere von der durch Aberglauben bestimmten Oralliteratur in Erzählform — in folgender Weise charakterisiert: es wird untersucht, welche *soziale Funktionen* dem in den Regeln ausgedrückten Aberglauben in einer Bauerngemeinschaft zugeordnet werden können. Dann werden die *Erscheinungsformen* dieses Aberglaubens beschrieben im Blick auf die in ihnen dargestellte *Objektwelt* und auf die in ihnen verwirklichten *Denkformen*. Abschliessend werden methodische Fragen der Analyse solcher Dokumente kurz problematisiert.

Alchet sur da la libertà grischuna

Insai da Jachen Curdin Arquint

I

Id es sgüra güst da cumanzar quist pitschen insai sur da la libertà grischuna culla constataziun cha'l problem da la libertà saja pel Grischun e pel Svizzer d'hoz alch plüchöntschi abstract. Quel problem nu para plü da tocker sül viv sco avant ons.

Sch'ün Svizzer d'hoz voul provar d'incleger ün pa plü bain il term libertà, lura cumainza'l a far differenzas tanter diversas libertats. I til gnaran adimmaint üna davo tschella: La libertà da conscienza, la libertà da cretta, la libertà da pressa (pensain a la discussiun sur da las normas d'infuormaziun da la Regenza Grischuna!), la libertà da commerzi ed uschè inavant.

Per gnir plü daspera al pled sto il Svizzer ed il Grischun d'hoz far simlas differenzas, uschigliö nu vain el a bröch inandret.

I para bod ch'ün term chi d'eira plü bod cler sco alch, fuorma uossa ün chomp ingio cha be giurists, politikers, filosofs ed istorikers as muaintan sainza fadia. Dimena, la libertà: ün chomp per specialists.

Quista impreschiun nun es uschè fallada, schi's guarda che chi vain publichà hoz e chi chi publicha hoz alch sur dal tema da la libertà: ils specialists pel dret da stadi, l'istoriker da dret, l'istoriker. Ils scriptuors s'occupan dal tema bod be a l'ur, qua o là fana üna remarcha critica (pensain a Cla Biert aint in seis chapitel «La Mastralia»). Poesias sur da la libertà politica, quai nu daja plü pro nus daspö ün tschert temp.

Davo constatà tuot quist para quai tuot curius cha la professores-sa da filosofia da l'università da Genevra, Jeanne Hersch, nu tratta il tema in ün möd abstract, ma ch'ella va per exaimpel landervia a

gündichar ün stadi o üna instituziun politica tuot simplamaing cun dumandar scha quistas instituziuns dan o mantegnan la libertà o sch'ellas al cuntrari tilla mettan in privel o tilla desdrüan.

Quista professoressa es (cun oters) üna excepziun perche ch'ella vezza il problem general e na be dal püt da vista svizzer dad hoz.

Ma quista excepziun ed otras nu müdan bler vi dal purtret general in Svizra. Il purtret ch'eu n'ha skizzà muossa simplamaing la situaziun d'ün pövel chi *ha* sia libertà politica e chi viva in üna situaziun ingio cha oters problems paran bler plü importants. Ün pa esa eir uschea cha divers istorikers e scriptuors s'han vuglüts separar cleramaing d'ün möd da verer la libertà sco cha quai d'eira il cas ils ons da la guerra fin circa dal 1950. Ils scriptuors svizzers per exaimpel nu voulan plü avair dachefar cun ün purtret da la libertà sco ch'el d'eira viv avant il 1945. Pensain a Max Frisch cun seis cuedesch: Wilhelm Tell per las scoulas. I nu voulan plü avair dachefar cul purtret da la libertà sco ch'el d'eira avant man avant il 1945, ma — quai stuvinia eir dir tuot cler — ün oter purtret nun hana chattà. Nossas relaziuns nu paran da spordscher il material.

Es quist fat forsa il motiv plü profuond per las difficultats cha nus Svizzers vain uossa cun nossa imna naziunala?

II

Ma uossa, davo quista cuorta survista: la situaziun da la libertà sco ch'ella as preschantaiva in Grischun. Uossa finalmaing alchet sur da la libertà grischuna. Per gnir a bröch cun quist baccun faina tuot simplamaing uschea cha nus giain davo a quai cha nossa litteratura rumantscha spordscha e muossa.

Sco cha tuot ils lectuors san, sta la litteratura rumantscha var 300 a la lunga — dal 1552 fin intuorn il 1830 — in servezzan da la baselgia e da la cretta. Temas chi nun han dachefar culla baselgia o culla cretta nu vegnan tocs per uschè dir. Id es eis cler perche. I's vaiva l'impreschiun chi nu füss *a seis lö* da far il sforz finanzial per alch profan. — Ma ün tema es gnü chattà degn da gnir trattà fingià fich bod aint illa litteratura rumantscha: il tema da la libertà.

III

Il Sentiner Martin Martin, chi d'eira ravarenda a Ramosch ha trattà il tema in ün möd impreschiunant e ha publichà sia «Canzun

davart la libertad da nossas trais ligias» aint in sia Filomela, gnüda edida dal 1684.

Cha quista prüma chanzun da la libertà es nada precis in Engiadina Bassa nun es be ün cas. Quai sta insembel cul fat cha l'Engiadina Bassa s'ha cumprada libra da l'Austria in ün möd specialmaing dramatic e quai cuort davo las Ot Drettüras, dal 1652 (perquei il titul *libertad da nossas trais ligias*). A las Ot Drettüras appartgnaivan las Drettüras da Tavo, Clostra, Castels, Schiers-Sewis, Churwalden, Belfort e Schanfigg. Davo ün temp da dischuordens e dad anarchia, da corrupziun e da crudeltà, da misiergia e da povertà, davo ün temp da pussanzas estras e da tirannia, d'eira nada in Grischun darcheu la vöglia e la forza dad esser svessa patrun, la vöglia e la forza da far uorden, la vöglia e la forza da rivar a l'independenza. Quist temp as lascha illustrar il plü bain cun noms sco Baldirun e Jenatsch e cun pleds sco Guerra da Trent'Ons e Scumpigls Grischuns.

Our da dalet e plaschair sur da l'independenza cha'ls Engiadinalis pon uossa giodair libertà scriva Martinus sia chanzun. Ma el tilla scriva eir our da la persvasiun cha la libertà nun es alch chi s'acquista üna jada e cha quai saja lura avant man. Na, Martinus vezza cler e net cha la libertà es ün privilegi chi dumonda ch'el vegna adüna darcheu reacquistà: mincha di esa da cumbatter ed ingrazchar per quel privilegi seguond l'idea da Martinus. In quel sen scriva Martinus sia «*Canzun davart la libertad da nossas trais ligias*».

Notain il cuntschaint prüm vers da quista chanzun per cha nus ans possan far ün purtret da la forza ritmica e linguistica da quista chanzun:

A Tots pagiais & natiuns
Parta Deis oura da seis duns,
Mo'l principal ais cur Deis dâ
Ilg seis soinch plaed cun LIBERTAT.

Dimena: sco prüma vain la libertà muossada e resguardada sco il dun il plü important cha Dieu parta oura da seis duns; sco dun il plü important sper il pled da Dieu. Il purtret cha Martinus douvra «Deis parta oura da seis duns» es da verer in möd tuot concret — Martinus dechanta la forza, la

pussanza e la richezza da Dieu, patrun da la vita. Il seguond vers chi loda ils duns materials, cha Dieu parta oura, argient, aur, onurs, quel es main ferm co il prüm vers:

Aur & argent ais ün thesaur,
Honus dal muond ilg muond stem'aut,
Ma tot à quai sgür in vardat
Trapassa loensch la LIBERTAT

Il möd sco cha Martinus inclegia la libertà vain plü cler aint il terz vers cun seis tun lom ed agreabel:

Utschels, limargias zainz'inclet
In spelms, deserts chi faun lur lett,
Haun qua dalet, canten dadaut,
Chi poun güdair la LIBERTAT.

Martinus vezza qua la libertà sco üna *ledscha da la natüra*, sco alch necessari per chi's possa viver. Sainza la libertà nu daja plü ne plaschair ne dalet da la vita, sainza la libertà nu's poja dir da schi a la vita. — Sco exaimpel tscherna Martinus ils utschels. Davo avair fixà uschea in ün möd fich impreschiunant cha la libertà haja üna da las plazzas las plü importantas aint illa creaziun, cumainza Martinus a dar exaimpels, a nomnar exaimpels actuals. Exaimpels da seis temp. La libertà, disch Martinus, es alch chi dumonda cumbatta. Ed el as volva als lectuors e chantaduors da sia chanzun e disch chi's dessan algordar da las difficultats, dals sacrificis e da las cumbattas chi ha vuglü fin cha las pussanzas estras sun stattas our pajais e fin cha la libertà es statta guadagnada.

Foe, spad' haun indürâ, plü mal,
Ilg Niderland & Portugal,
Haun miss lur vit' & saung à quà
Per congüstar la LIBERTAT

T'algord'impâ dal temp passà,
Co Deis la terr'ha chiastiâ
Cun spad'è foe statt grittantâ
Ch'l'ha tut la nossra LIBERTAT

In greiv' angoscha stat redüt
Tot noss pâgialis qua stat deschdrüt
Quai tot ha fatt ilg noss puchiâ
Chia Deis ha tut la LIBERTAT.

La perdita da la libertà, quai resorta cler, nun ha per Martinus ingün oter motiv co cha Dieu, grittantà tras l'uman chi nu s'algorda da seis duns, volva davent sia fatscha, e piglia tras quai la libertà. Perdita da la libertà voul dir per Martinus: anguoscha, temma destrucziun e güdischs chi ston tegner e defender ledschas estras. La descripziun da la situaziun dûrant ils Scumpigls Grischuns es exacta e po valair, schi's guarda bain, adüna darcheu per cas simils (pensain a l'Ungaria, a la Tschecoslovakia, a tschertas naziuns in Africa e.u.i).

Aint il settavel vers descriva Martinus la vouta. Là passa'l dal pled subjecziun al pled *libertà*. Legiain üna jada:

Vuo Iüdischs stuveivat jürar
Statuts dad eisters Fürsts salvar
Deis ha manâ, ilg fatt müdâ
Subjection in LIBERTAT.

Davo quista müdada chatta Martinus darcheu il tun lom dal terz vers, dal vers chi muossa la libertà da las bes-chas cul exaimpel dals utschels.

El chatta quel tun lom aint il ottavel vers ingio ch'el muossa il paür liber chi po verer sainza temma e cun cour grat in tuottas quatter direcziuns, per ch'el s'incordscha in che situaziun privilegiada ch'el viva, sch'el ha la libertà.

Volva teis oegls in Oriaint
Da mezdi, nott ed Occidaint,
Non ais sco nuo poevel chi hâ
Tant pretiusa LIBERTAT.

Lura disch Martinus: In fuond· vaina cumprà la libertà sainza fadia, per pac raps. Quels chi han gnü da far ün sforz plü grond, ün sforz cun lur vita quai sun stats ils perдавants.

Quant saung hvai spons vuo Pardavants
Per sa spendrar our suot tyrans
Cun pauc danaer ha Deis güdâ
Ch'nuo vain cumprâ la LIBERTAT.

Nus nu lain invlidar cha'ls d'Engiadina Bassa vaivan pajà quella jada 26 000 rentschs e ch'els sun stats buns da pajar tuot la somma pür duos ons davo stat fat giò il contrat, pür dal 1654. Scha nus fain il quint quant cha quai füss stat 300 ons plü tard, lain dir dal 1952, schi rivaina a la somma d'ün mez milliun francs; hoz füss quai ün bun pa daplü. Quistas cifras discorran üna lingua clera pür al mumaint cha nus tgnain adimmaint cha raps fluids d'eiran s-chars quella jada, chi's pajaiva il bler in naturalias.

Il deschavel vers tratta ün problem special, la libertà da cretta. Martinus metta l'accent sün quist fat perche ch'el ha l'impreschiun cha la generaziun giuvna (la chanzun vain publichada dal 1684, dimena var trenta ons davo ils Scumpigls Grischuns e davo las difficultats da la cuntrerrefuorma). El ha l'impreschiun cha la generaziun giuvna nu sapcha da stimar quai avuonda, pervi ch'ella nun ha vivü las difficultats.

Davo quista admoniziun va'l inavant e rova al lectur da verer tantüna la situaziun, da stimar la grazia ch'el gioda uossa:

Tü poust semnar, tschuncar, manar,
Far tias lavyors la pro cantar
Poust dir l'ais mieu, quai Dieu am'dâ
Quai fa la noebla LIBERTAT.

Quist es forsa il vers il plü modern da tuot la chanzun da Martinus. Perche? Perche ch'el cuntegna la formulaziun: «Poust dir l'ais *mieu*.» Lura vegnan amo ils vers finals cul lod da Dieu e cul aröv cha Dieu detta sia benedicziun e cul giavüscher per buns güdischs e bunas autoritats.

Schi canta laud à quell noss Deis
Ch'el ha udi ls suspürs dals seis
Ch'e ha nossa terr'incurunâ
Cun uschè noebla LIBERTAT.

Mo sch'ella dess pro nuo restar
Ledschas cun Deis sa sto drizar
Iüdischs eir jüsts stoun gnir tschantats
Quai vol la dretta LIBERTAT.

Quells ston ils mals fick chiaxtiar
Ils buas our d'grifflas lur spendrar
Chia viver s'poss'in honestat
Quai ais la dreta LIBERTAT.

Vuo Iüdischs davri sü voss oegls,
Guardâ sün quell chi zez'in câl
Temaì à quell, sul quell hondrâ
Ilg qual dà spad'& LIBERTAT.

Manteng'ô Deis tot quaist pagiais
Ilg poevel nett chi chia l'aint ais
Manteng' Superiuritat
Et nossa noebla LIBERTAT.

Cun sia chanzun nada illa seguonda mita dal 17avel tschientiner as muossa Martinus d'üna vart sco ün chi dechanta la libertà ragiunta, ma da tschella vart voul el eir muossar cha la libertà es ün dun unic in seis esser e chi's dessa verer bain da til chürar usche ch'el nu gaja a perder.

La posiziun da Martinus es severa e seriusa, ma a listess temp plaina da dalet per la vita. Sia posiziun es quella d'ün uman chi pensa al möd da l'età d'immez ed al möd sever dals reformatuors. Ma da tschella vart collia'l quista severità cun ün möd verer di fich modern, cun ün möd-da verer chi muossa fingià l'idea da la *libertà individuala in colliaziun culla proprietà privata*. Il vers «poust dir l'ais mieu» muossa quai fich cler.

Ma nus nu lain pero survalütar quist'idea da la *proprietà privata*, cun quai cha nus savain our dals statüts da quel temp, cha la libertà dal *singul valaiva quella jà plü pac co il bön cumün*. Quel gaiava adüna ouravant.

IV

Il tema da la libertà nun es davo plü gnü toc e quai per divers ons aint illa litteratura rumantscha. S'inclegia cha quai ha dachefar cul svilup istoric, chi ha fat passar il tema da la litteratura aint la pratica dal minchadi. Dürant il 17avel e 18avel tschientiner daja prunas da redacziuns da statüts in noss cumüns d'Engiadina. Quai nu voul dir nögli'oter co cha cha'ls singuls cumüns as dan svessa l'organisaziun exteriura e chi's ston per forza occupar dal problem da la libertà, na in möd teoretic, ma in möd pratic.

Pür il 19avel tschientiner cull'influenza da la revoluziun francesa, culla romantica e cul naziunalissem dan nouva vita al tema da la libertà aint illa litteratura rumantscha. Pel solit vain il tema da la libertà trattà sco in otras litteraturas da quel temp (Martinus dschain quai quia in parantesa nu para influenzà dadouraint), il tema vain trattà sco in otras litteraturas da quel temp, voul dir el vain collià cun ün *sentimaint romantic* per la *patria*. Els cugnuoschan quel sentimaint da tantas e tantas chanzuns e san circa che elemaints chi vegnan nomnats. Eu prov da dar ün exaimpel:

1. Süll'otezza da nossas muntognas truna la libertà.
2. Las chadainas da las muntognas sun simbol per la forza e per l'uniun.
3. Ils eroes da plü bod ans oblajan dad esser units.
4. La libertà es üna jerta soncha.

Uschea o circa uschea sun fabrichadas circa tuot las chanzuns da libertà dal 19avel tschientiner. Ün cunfin net tanter *patria* e *libertà* nu daja in quellas chanzuns (Martinus nu douvra il pled *patria!*); *patria* e *libertà* quai vain masdà. Id es sgür ch'in tuot quistas chanzuns es il sentimaint pella patria l'elemaint ferm cun quai chi'd es bler plü simpel da metter quel in poesia co il tema da la libertà e da l'independenza.

Nus stuvin dir quia cler e net cha tuot quels auturs svizzers chi han scrit chanzuns e poesias cun quist tema as sentivan manats d'ün sentimaint *sincer* per la *patria*. Il sentir da quella jada d'eira uschea. Eu vögl dar l'exaimpel dad Alfons de Flugh, ün figl da Conradin de Flugh chi scriva dal 1842 a seis ami Conradin von Mohr:

«Aber was soll ich Dir von der ganzen Rheinreise sagen, als dass es mir sehr wohl gefiel? Mein Zürichsee aber und meine Schneeberge fehlten überall, und aller Vergleich fiel zu ihrer grössten Verherrlichung aus. Die weltberühmten Rheingegenden verschwanden sehr vor der Erinnerung an jene herrlichen Schweizerlandschaften. Wieviel reiner, ernster, erhebender und besonders wieviel *freier* und frischer ist eine Schweizergegend! Trotz des weiten Horizontes ist es einem hier so eng, so klein, so öd. *Die Berge erheben den Geist*; die Ebene drückt ihn nieder. Die Berge möchte man ans Herz drücken und auf die klare, gedankenbleiche Stirn küssen; in der Ebene kein Halt, keine Stütze, man liegt im Staube. — Jetzt scheint es mir klar, warum die *Schweiz* eine *Republik* ist und *sein muss*. Ich möchte doch nichts anders sein, als ein Schweizer. Bonn — Du kennst es — gefällt mir nicht. Eine Stadt von 15 000 Einwohnern sieht in der Schweiz anders drein. Hier duften die Gassen so kannibalisch, dass es Wochen braucht, um sich nur einigermassen daran zu gewöhnen. Von dem allgemeinen Wohlstand, der Reinlichkeit der Schweiz ist nicht die Spur. Ausgezeichnet schön ist das Universitätsgebäude, dann die sogenannte Poppelsdorfer Allee und Schloss; die Gegend erträglich: im ganzen flach, in der Ferne das Siebengebirge, Hügel in der Nähe.»

Uschea, sco cha Alfons de Flughi scriva uschea gniva resenti la patria quella jada, in quel temp.

V

I fa star be stut cha ün scriptur rumantsch sursilvan da quel temp nu's tegna gnanca zich vi da quist möd da verer general e ch'el es bun da trattar il tema da la libertà e da l'independenza in agen möd cun forza e paschiun, sco a seis temp Martinus.

Eu manaj a Gion Antoni Huonder cun seis «Pur suveran».

La chanzun da Martinus nun es gönüda populara, ma il pur suveran es gönü ad esser (bainschi fich tard) sper la Ligia Grischa e la «Chara lingua» alch sco üna chanzun naziunala rumantscha.

Quai chi dà il caracter, e l'agen caracter a la poesia da Gion Antoni Huonder es ch'el metta l'idea da la libertà in stretta colliaziun cull'idea da l'*independenza* e cul sen per la *proprietà acquistada e jertada*. Independenza e proprietà privata sun da defender cun forza.

Il Pur Suveran

1. Quei ei *miu* grepp, quei ei *miu* crapp
Cheu tschentel *jeu miu* pei —,
Artau hai *jeu* vuss de *miu* bab,
Sai a negin marschei. —
2. Quei ei *miu* prau, quei *miu* Clavau
quei *miu* regress e dretg —!
Sai a negin perquei dengrau,
Jeu sun cheu *mez* il retg.
3. Quei *mess* affons, *miu agien* saun,
De *miu* car Diu schengetz; —
Nutrescha quels cun *agien* paun —
Els dormen sut *miu* tetg.
4. O libra libra paupradad,
Artada da mes vegls:
Defender vi cun tafradad
Sco poppa de mes egls!
5. Gie liber sundel *jeu* naschius,
Ruasseivel vi durmir,
E libers sundel si carschius
E libers vi murir!

I s'es subit tschüf dal text, pervi ch'el ans tocca tras la fuorma da l'*eu* e tras il possessiv *miu*. (Dal rest esa uschea cha Huonder suot-tastricha *miu* mincha jada.) Tuot la poesia es alch sco üna festa, sco üna glorificaziun da l'*eu* dal pur suveran, dal *paur liber ed independent*, e quel *eu* o *miu* as repeta aint ils 5 vers o aint ils 20 versets na damain co 24 jadas. Quist plaschair da l'*eu* dal *pur independent* til fa avair il sentimaint d'esser ün *rai*. Il paur es ün *rai* chi nun ha da savoir grà ad ingün'orma. El dvainta quel chi's dà svess sias ledschas. Il plaschair da la proprietà crouda in ögl, il plaschair d'avair tuot ad agen nun ha cunfins: la grippa, la crappa, la

prada, ils tablats e lur contuorns. Seis uffants, seis agen sang, til implan cun superbgia, els sun suot seis tet.

Quista libertà, quista independenza voul il paur chürar sco la poppa da seis ögls. Quai es üna independenza, üna libertà chi ha alch salvadi vi da sai, üna independenza ostinada per uschè dir, e cun ostinaziun e testardezza es il pur suveran pront da's dostar per quai ch'el ha ragiunt.

Scha Martinus giavüscha al paur in tun lom da dozar sia ögliada e da verer in tuot las quatter direcziuns, lura vezza il lectur il purtret dal paur chi sta sül agen terrain e guarda cun quietezza da dalöntsch e vain uschea planet conscient da sia situaziun privilegiada.

Per Huonder es quai oter. Pro Huonder vezza il lectur al paur aint illa natüra, in üna posiziun forsa sco ün chamotsch sulla grippa in üna posiziun chi muossa la forza salvadia e la superbgia: Guarda quist qua, quai es meis revier, qua vegn eu maister cun tuot. I para bod cha'l pur suveran da Huonder stess batter cul pè sül grip e dir: guarda qua, quist es meis. El nu sta lönch a stübgiar sur da quai chi'd es sieu. Quai es sieu simplamaing pervi ch'el ha iertà quai. Il pur suveran es ün individualist. El nu sa grà ad ingün oter co a sai svess ed a seis per davants. Tant pel prüm vers.

Aint il seguond vers vain muossà il paur sco ün toc da la natüra in seis chomp da lavur — prau, clavau — regress dretg. Per quai nun ha'l da render quint ad ingün oter co a sai svess.

Il terz vers muossa al paur cun sia famiglia — ed el es superbi da pudair dar tet a tuot la brajada.

Our dals traïs elemaints essenzials da quist traïs vers: la proprietà privata (prüm vers) — il chomp da lavur (seguond vers) la famiglia (terz vers) sbuorfla il dalet salvadi vi da la libertà e vi da l'independenza chi dà il tun ed il tema pels ultims duos vers.

Ün autur important da la Svizra franzesa Gonzague de Reynold, disch in seis cudesch sur da la Svizra cha'ls vers da Huonder sajan ils vers ils plü swizzers ch'el cugnuoscha. La chanzun cha Huonder ha büttà nan in möd uschè perfet exprima l'ideal da la libertà grischuna dal 19avel tschientiner, ün ideal chi sarà gnü resenti uschea fin davo la seguonda guerra muondiala.

La poesia d'eira nada tranter il 1860 ed il 1865. Ma ella nu vaiva survgni üna melodia adequata sco per exaimpel tschella poesia da Gion Antoni Huonder, la Ligia Grischa. Dal 1901 as volva lura

Caspar Decurtins, il Liun da Trun, a Hans Erni e til giavüscha da cumpuoner üna melodia pel pur suveran. Ma il cor dad Erni as dosta e nu chanta la chanzun. Dal 1905 publichescha Erni la melodia, ma eir quai resta sainza rebomb. Pür culla prüma guerra muondiala e lura culla seguonda vain la chanzun ad esser populara pro'ls sudats sursilvans. Rebomb svizzer chattà la chanzun pür dal 1948, v.d. pür var 80 ons davo cha la poesia d'eira stattà scritta e pür in quel mumaint cha l'ideal da la libertà dechantada vaiva cumanzà a sblachir magari da red.

VI

Las duos grondas poesias rumantschas sur da la libertà grischuna quella da Martinus e quella da Huonder sun tuottas duos nadis our d'üna situaziun politica e culturala precisa. Nus vain provà da tillas incleger tuottas duos our da lur temp e da tillas lovar in lur temp.

I's vezza plü co cler cha'l möd da preschantar la libertà as müda seguond la realtà.

Illa seguonda mità dal 17avel tschientiner cumainza il paur engiadinalis a's render conscient che ch'el ha survgni tras la libertà e tras l'independenza da l'Austria. El vain a savair ed ad incleger che chi'd es *proprietà privata*, che chi'd es *as-ch* (Nutzungsrecht) aint il vast sen dal dret.

Vers la mità dal 19avel tschientiner, var 200 ons plü tard vain miss l'accent uschea cha la libertà nu po gnir incletta sainza la proprietà privata. *Sainza quella ingüna libertà*. Quist es probabel-maing l'idea chi'd es la basa per l'uscheditta libertà grischuna. Una libertà cha nus vain survgni uschè bod perche cha nossa istorgia grischuna muossa trats d'ün destin ourdvart favuraivel per ün tal svilup. Il scumpart dal terrain sün blers maina nempe adaquella cha'l paur ha pudü lavurar fingià bod sün seis agen.

Quist fat es stat decisiv per destin dal Grischun e pel svilup general dal sentimaint da libertà.

Un sguard süll'istorgia da la Germania, da l'Italia, da la Russia, da l'America dal Süd o da las Indias ingio cha'l problem da las latifundias, v.d. las grondas proprietats da terrain, ha dat dachefar e dà per part dachefar tragicamaing amo hoz, ans po dar la dretta masüra per l'importanza da quist problem e dal connex ch'el ha cul destin da subjecziun e libertà.

Der Versuch «Alchet sur da la libertà grischuna» geht von der Frage aus, wann und wie das Thema der Freiheit in Romanischbünden in der Literatur thematisch wird. Anhand von zwei eigenständigen bündnerischen Verarbeitungen des Themas, durch Martinus (1684) und durch Huonder (zwischen 1860 und 1865) wird dem Wandel in der Beziehung zum Thema und in der Formgebung nachgespürt.

